

小
方
壺
齋

小方壺齋

北征日記

黃岡洪良品著

同治十年十二月九日余假滿入都經兒送至沙河橋頭灑淚而別暮宿舊洲同宗次日用旗蓋送至河干陳問齋通判亦來道別泊舟去鵝公頸渡十餘里已漏下二鼓矣

十一日泊鵝公頸渡卽舉口也舉水入江處形屈曲如鵝頸故名酈道元水經注舉水出龜頭山西北流經蒙龍城南又西南經湖陂城又東南經赤亭下爲赤亭永南流注於江謂之舉洲卽烽火洲也梁徐文盛破任約進軍大舉口卽此處其西南卽坪江今謂之團風鎮

十二日發鵝頸渡風帆逆駛江楓岸柳蕭瑟動人行四十里晚泊葉家洲

十三日舟行數里早飯陽邏堡顧祖禹讀史方隅紀要曰其地東接蕪黃西抵漢沔誠要害也三國時先主約孫權拒操旦夕使人於此邏吳兵之至因名宋人置堡爲守元伯顏破宋兵於此望白虎山元世祖所登以瞰宋兵者也過沙燕口元將阿朮所鑿以襲宋軍者也是日過武當口望青山磯夕陽已落江昏黑不見人已而燈明如晝霞光燭天洋樓番舶鱗列江岸泊漢口漢水西來至漢陽之大別山下入江亦曰沔口

十四日寓漢口楊子總巷午時立春大雨

十六日登舟泊大別山下與內子猷兒泛舟登晴川閣閣舊燬於兵火同治五年閣督官文飭漢陽知府鍾謙鈞重修主事王柏心有記袁中郎云晴川閣與黃鶴樓分岸立盡會城之山川林藪朱門繡陌若爲之設色者閣中楹聯之佳者七言云山氣西分巫峽雨潮聲東壓海門濤八言集句云北合沅湘南合漢沔東望夏口西望武昌末署江右鄒舒章題對岸爲黃鶴樓亦於同治九年重修復舊是日午後開帆行十餘里

十七日過蔡店有汶河卽古之三澨也禹貢過三澨注云三澨水名今郢州長壽縣磨石山發源東南流者多三澨至復州景陵縣界來又名汶水疑卽三澨之一是也

十八日過潰口宋王應麟地理通釋潰水故清發水也西北自隨州流入注於沔謂之潰口春秋吳敗楚柏舉及清發是也唐劉長卿詩暮雨不知潰口處卽此一帆風利望小別山在微茫煙靄間山形如甌亦名甌山在漢川縣南十里過數里又有陽臺山下有陽臺渡按陽臺山本名羊躡山蘄州顧黃公詩序曰漢川羊躡山以形似也其稱陽臺者音近之訛其詩云羊躡一峰秀百里瞻孱顏何人強解事喚作陽臺山康熙時產五色芝滿崖谷徐子景方伯易名曰采芝山施愚山有詩所謂誰言銅池秀叢雜荒谷間又云達賢欣覩記嘉名錫茲山一洗陽臺陋刻石層崖顛是也是日日未哺行一百二十里泊漢川縣十九日過繫馬口揚子口按漢水一名襄河又名長夏河長夏河有揚水疑卽此行八十餘里泊蚌湖二十日入沔陽州界斜風細雨水煙一白輕帆迅駛行百餘里泊仙桃鎮二十一日風利行一百二十里泊岳家口塵市鱗列人煙輻輳燈光隨流上下聞熊氏花園亭臺幽勝日暮不及游覽

二十二日午過黑牛渡雨作行五十餘里宿潛江縣郭外五里

二十三日雨甚且行且止泊芭蕉塘已而雨止復行數十里野泊彭家集是日行計三十餘里

二十四日爲小除夕行四十餘里泊長流苑舟中與妻孥圍鑪飲酒回憶去年是日泊四川萬縣之湖灘吟詩獨坐喧寂迴判然而頻年作客一舟如寄祭社浮燈非復故園風景也

二十五日行五十餘里入荊門州界楚絕書云州東南有內方山禹貢所謂內方至于大別也哺泊沙洋鎮登岸散步至市而返

二十七日行一百里宿石牌

二十八日行六十里宿獅子口

二十九日大風入鍾祥縣界行泊西河店度歲

十年正月元日天未明大雨雪以風自元日至三日不晴仍留西河渡口

初四日天始霽開頭行過安陸府城爲古郢中地後周曰石城羊祜鎮荊州立石城以爲固樂府古題要解石城女子莫愁善歌謠其詞曰莫愁在何處莫愁石城西艇子打兩槳催送莫愁來今漢水西有莫愁村王璣詩村近莫愁連竹塢人歌楚些下蘋洲卽此王阮亭秦淮雜詩云莫愁好作石城游其所謂石城蓋石頭城耳後人因訛石城爲石頭城故江南有莫愁湖其實莫愁石城人家故在楚也余作石城曲以正傳聞之訛唐元和志郢州子城三面墉基皆天造正西絕壁下臨漢江石城之名蓋取於此

初五天天色清和望遠山青葱迤邐帆隨峰轉沙平水闊一碧無際行九十里泊轉渡灣

初六日午憩流水溝小山縋互江岸山頂有寺寺下村煙茂密塵市掩映綠樹間居人於山旁築堡以禦流賊行七十餘里泊白貓洞上

初七日入宜城縣界古鄢國左傳王沿夏將欲入鄢亦爲郢城漢劉先主封宜城亭侯宜城之名自漢有水經注宜城縣有大山山下有廟漢末多士其中刺史二千石卿長數十人朱軒華蓋同會於廟下荊州刺史行部見之雅歎其盛號爲冠蓋里而刻銘之宜城故城在今縣南出美酒梁元帝詩宜城醢酒今朝熟停鞍繫馬暫棲宿余停舟漢岸命僕於村肆沽酒其味酸僕嘗而棄之竟持空壺歸余笑曰酒以酸爲上汝殆未知其趣耳再沽而飲之果香冽異他釀聞唯井水所釀獨異餘不能逮也縣南有宋玉墓不及憑弔薄暮過小灘泊漢水北岸沙洲上纍纍多怪石五色斑駁不減晉黃之寶石山也命僕囊取妻孥

爭拾玩以爲樂已而風復利行十五里泊小河口

初八日自宜城入襄陽界王阮亭蜀道驛程記云宜城北十五里過黃叔度墓有明督學徐枋撰碑自此傍漢江行青山白雲風帆沙鳥極曠森之觀余以舟行泝漢水而上百里間隱隱數峰蒼翠近人知爲鹿門蘇嶺諸山是日泊石灰窰

初九日泊襄陽東津灣卽龍尾洲宋張貴與元將阿朮戰敗處按潯水出漢中府甯羌州北嶓冢山東至漢中府南鄭縣南爲東漢水東漢水自陝西白河縣流入湖廣界又東流經鄖縣至均州又東南流歷光化穀城二縣至襄陽縣東津灣折北而南有權關算估舟於此蓋其上流有光化縣老河口鎮陝西白河鎮商賈輻輳往來舟必經此余時附估舟行

初十日仍在東津灣候關望一山聳然高綿岡疊壑蜿蜒而東土人指謂余曰此虎頭山也一作阿頭山東漢初岑彭破張揚於阿頭山卽此

十一日開頭行三十里泊樊城鄆道元云樊城樊仲山甫所築也與襄陽城隔水對峙襄陽爲吾楚上游門戶樊城又襄陽層齒形勝相犄角皆自古戰守地向唯土垣咸豐同治間始築甌城建飛樓以守賊不敢犯入城石路無塵市屋如櫛登城北跨鶴樓望襄陽城郭大隄橫互萬山峴首諸峰嵐光秀色如在目前樓供呂仙像祈籤極靈余詢終身得籤云漁父飄然自遠來清江江面任徘徊長竿閒向船頭住笑看嶺梅花正開暮返舟中猷兒游襄陽亦至爲言入城至銅鞮坊登昭明臺而已按梁昭明太子集名士劉庾訂文選於此今有文選樓

十二日擬遊隆中不果行

十三日因驟車值昂改雇小車

十四日舟泊樊城西三十里之竹竿店候車回望萬山峴首諸峰蜿蜒不斷依依如送人也

十五日辰刻車至挈眷登岸啓行天驟北風微雨晚宿鄧家鋪度元夕燈火噉竹聲達旦余與妻孥惟旅館對酌而已

十六日行二十餘里春陰晦靄寒翠羃野因行李過重命僕回樊添雇一車宿楊柳驛簫鼓喧闐與元夕無異自襄以北皆然也殊不類吾黃之以元夕爲限耳

十七日由柳陽驛過白河卽水經之消水也源出嵩縣雙雞嶺近南陽府至樊城合東流水俗名白河一名白水是日行六十里宿新野縣隸河南南陽府城內有子城爲漢昭烈屯新野時所築縣學有議事堂俗傳昭烈與徐庶議訪孔明於此又有漢光武昭烈二帝廟城南花陂卽陰麗華故居也縣西北有樊陂俗謂之凡亭陂聞爲漢樊重所鑿云路旁碑石林立恩恩不能讀也

十八日行六十里入南陽縣界宿瓦店

十九日過隴西砦繞白水而行望山單椒峭立嵐翠照人土人曰此豫山也俗名獨山有三十六陂其西一山相去里許天然秀異土人曰此豐山也山海經神耕父處之常游清淦之淵出入有光有九鐘焉是知霜鳴卽此山也是日行九十里宿南陽縣之新店

二十日過博望驛漢武元光六年封張騫爲侯國劉表遣昭烈拒夏侯惇於博望燒屯僞遁因伏兵大破之卽此地今則立土砦市聚數十家而已晤廣西熊九成同年亦挈眷入都茶話數刻卽別入裕州界行六十里宿趙河鋪

二十一日天微陰過歌鳳城相傳爲孔子遇接輿處過裕州爲古方城邑漢堵陽地酈注所謂緒陽也有堵水源出方城山城南有漢廷尉張釋之祠墓州西關外爲張敞故里東三十里有祠像望諸山綿延蒼

秀一峰聳如筆尖不知何名按方輿紀要云州北三十里有七峰列峙下有暖泉北十里有黃石山亦奇勝恐卽此也過扳倒井有光武祠祠中曷旒巍然壁間畫二十八將像衣冠壯偉座側懸一聯云魂魄千年猶念故鄉父老書圖諸將如見漢官威儀祠外有井上覆以亭水極清冽卽扳倒井也汪雲壑殿撰詩云北條多支流湫見五無定噴騰或山梁聲沸亦澗徑居人憚遠汲掘地一泓瑩眾口諳俚名故老熟志乘絳衣昔行兵赤伏比符應望梅士心饒進粥臣力罄動搖石可轉神漢走不脛暑疑佩刀刺湛若方諸孕道啜食蠡茶香漚丐其剩靈祠咫尺通撫衣肅神聽翼然王者曷旁侍耿若鄧丹青儼雲臺俎豆報功報民生資井養帝運厭火勝釣臺有清泠何年涉巖磴余初不知井之來歷讀此詩可補正史之闕是日行八十里宿獨樹店

二十二日入葉縣界望黃城山危峰矗雲縣巖巖送翠樹木蒼翳岡巒蜿蜒起伏連山奔走銜接數十里不斷山產石土人斲以爲硯余購二枚色青而質不甚堅山下石路犖确河水曲折屢渡唐書地里志葉縣黃城山是長沮桀溺耦耕之所有東流水則子路問津處過舊縣爲楚葉公封邑有玩龍臺又五里過墳臺店有王喬墓葉縣南關外有雍正三年葉令崔赫題漢飛鳧仙令王公神道碑又數里渡昆水爲古昆陽城光武大破王尋王邑兵於此又十里爲允漈鋪有橫碑書止子路宿處五字是日行八十里宿葉縣南關葉縣唐仙鳧縣也城北臨渙水蜀道驛程記云葉縣諸水如渙如醴如昆如湛皆趨汝潁以達淮泗蓋葉縣渙水外又有醴水昆水湛水汝水渦水也

二十三日行十里見左陂右畝平野無際麥秀一碧路旁有碑題沮溺耦耕處五字又行十里有一小山石黝成堆其旁皆棗林柳蔭路旁亦有一碑題孔子使子路問津處八字前臨大河爲汝水所經俗名沙河河有土橋俗名耦耕橋黃城山在其西又行十里過保和砦望一山數峰高立旁一山迤邐而長蓋卽

首山也其南亦有一山山頂一塔直插霄漢括地志首山一名襄山徐廣曰首山卽封禪書所謂薄山也按史記封禪書申公曰天下名山八而三在蠻夷五在中國華山首山太室泰山東萊此黃帝所常游與神會莊子曰黃帝將見大騶乎其茨之山至于襄城之野遇牧馬童子問塗焉今路東高阜上有碑大書軒轅黃帝問道處又有一碑大書漢桓公之神道蓋卽桓榮冢也兩旁細鐫碑文引證精博力辨雷夏首陽之別於首山據一統志首山在襄城縣南謂桓榮墓在首山陽於地爲確其墓歲久湮沒馮智舒表而出之余讀其詞甚古晚宿襄城南關旅店內壁上有梅仙女史月夜感懷詩其詞云此夜一輪月清輝萬里寒可憐閨裏見正是馬頭看鴈影征書斷雞聲客夢殘思君茅店夜無語倚闌干蓋婦憶夫詩也余與內子讀之歎其悽惋因和作以示內子云一片關山月年年兩地寒那知今夕共仍在故鄉看短柝催霜急孤燈帶漏殘何人怨遙夜獨照淚闌干蓋客途猶幸與內子聚處也是日計程行六十里

二十四日出襄城北關行二十餘里路旁有碑大書吳季子挂劍處又行十餘里有蔡孝子祠孝子蔡順家貧拾葚奉母又行十里爲潁橋卽潁谷封人地潁考叔墓在焉隆然高起形如小山阜墓碑大書鄭潁谷封人考叔墓八字明成化十年甲午歲冬十一月山東右布政使李敏書筆法端秀墓側有潁考叔祠係元時建入祠謁考叔像肅然起敬晤趙維五茂才坐談片刻卽返邸寓行數武有潁濱書院乾隆時建是日午後微雨僅行四十里

二十五日行二十餘里入許州界爲魏都許昌地離城二十里傍西而行南有許田又過興源堡石岡店入長葛縣界爲鄭繻葛地又行二十餘里過太平店堡砦內有石碑書葛仙翁採藥處是日天氣陰翳晚過潁水水經注潁水出河南密縣大鵬山河上有石橋以渡計行八十里宿會河鎮

二十六日早行望豐山色葱翠形如飄旗土人曰此際山也至黎園入新鄭縣界古有熊國周封黃帝後

於此春秋時爲鄭武公國名有軒轅邱黃帝生於此路史注軒轅所都後人因以名邱又有王女池在新鄭西南水經注潁水出具茨山西池爲陂池謂之王女池過潁洧水路旁有碑書子產乘輿濟人處潁水洧水源皆出密縣至新鄭合有橋曰宛陵橋南有金龍大王廟拱栢宏麗前有碑刻序一詩一爲新鄭令某作其序據徐文長傳言金龍大王姓謝名緒宋末諸生經元亂赴河而死至明助太祖滅元復仇封爲河神其詩註云金龍山名余停車望西南連山綿延蒼翠萬狀繞城東關而行有子產祠又有軒轅故里碑北關外有歐陽永叔墓裴晉公墓戊辰余過此弔之題詩於壁今不可問矣是日行七十里宿郭店卽郭威故里市南爲五龍口有八景其一爲九龍急漲云驛有呂獻公墓碑西有周世宗陵

二十七日過袁家堡林錦店爲管叔鮮封地亦名管城其東六里曰郟城楚子敗荀林父處州有鄭水京索二水入之有僕射陂余舊過此有野風吹折白蓮影鷗鷺一雙相對愁之句是也按王摩詰有次鄭州詩是日行八十里宿東趙莊去黃河沿七里

二十八日過黃河滎澤口酈道元水經注漢明帝時議治汴築渠樂浪人王景築隄起滎陽東至千乘海口千有餘里所謂金隄也同治戊辰河決於此是日大風揚沙金隄橫互決口新築游隄上金龍大王廟廟前有碑敘言同治七年使相合肥李公鴻章開張秋口困賊於滄瀛德棣之間是時霖雨連綿黃運並漲六月二十八日首逆張總愚伏誅賊股蕩平滎澤卽於是日決口使早三日決口則賊未可滅滎澤受眾山之流力能刷沙使決他處則河流不能奪溜其害更不可問茲若擇時擇地而決天意也故事河決河臣必上疏自劾謂簡重臣是役河督蘇公廷魁仍請自劾不數日而決口告塞費白金一百三十餘萬較往時僅十之一云云爲觀察使尹耕雲筆渡河沙重難行僅行三十餘里宿王祿營

三十日行數十里入汲縣界爲殷牧野處過衛輝府城郭壯麗南關外石橋跨河亂艇泊岸又有孔子擊

磬處石碑太行時其西衛河環其北爲衛朝歌地周封康叔於此衛河發源蘇門山唐挹遊太行山記山自北紀發宗行平定州至上黨遼沁潞澤衍互東起彰懷衛三府南受藩垣中原自是西奔爲中條至雷首東發燕山至碣石左右皆其託祖故曰太行又以界省故名省曰山之東山之西通志太行山綿亙數千里其間峰巒巖洞景物萬狀雖各因地立名實皆太行也沈方舟詩千盤拔河內一折走遼東出府城十里爲頓坊鋪疑卽古頓邱地有比干墓路旁大書殷少師比干廟墓石已斷爲三非復孔子之舊題也是日行九十里宿唐家屯

二月初一日行二十里過淇縣殷朝歌地周沫邑漢地理志朝歌紂所封周武王弟康叔所封更名衛今南關外有殷三仁故里殷朝六七賢聖故都二石碑又有石刻殷墟二字北關外里許有九十畧勤木坊又有淇澳故趾石碑任昉述異記衛有淇園出竹在淇水之上余過淇側惟荒陂亂澗斷橋流水無所謂叢竹猗猗者焉又行二十五里過高村店傳爲古鹿臺地村北有淇水急湍亂石聲淙淙然桑欽水經淇水出河內隆慮縣西大號山今水上有石橋爲淇水橋有古碑刻淇水二字又有靳脰河源出輝縣東流經淇縣界因靳朝涉之脰故名又行十餘里大風入濬縣界爲漢黎陽地縣東有大伾山亦名黎陽山有黎水又行十餘里入湯陰縣界宿宜溝驛鄘道元水經注淇水又東謂之宜師溝亦謂之黃雀溝有先賢黎公祠卽子貢也祠外路旁有子貢故里碑爲明崇禎辛未宋學詩書入祠敬瞻廟貌古柏參天蒼苔在地余與猷兒肅然下拜讀壁間石刻詩有黎水遠沾洙泗澤伾山近接杏壇香之句是日行七十五里初二日行二十里過光村鋪爲浣衣里嵇侍中血濺帝衣處有祠路旁有晉侍中嵇紹之墓石碑又過湯陰縣入城內謁岳忠武王祠祠外有施將軍全立像入門大樹參雲枝皆南向詩碑林立中有○○○高宗純皇帝御製詩碑覆以亭兩旁有武穆手書石刻數種聞有手卷墨蹟藏其家未及求觀僅見其摹本

書體迢逸憶居鄉時過同里鄭九畹家獲觀武穆親錄諸葛傳手卷與此筆法無異洵奇寶也祠柱懸聯甚佳其詞云詔捧金牌千秋冤獄莫須有廟依梓里百戰忠魂歸去來爲督學使者吳芳培撰余戊辰過此亦有詩云十年戰苦陣雲昏自壞長城莫再論南渡河山成廢局故鄉父老哭忠魂靈風古劍鳴虛壁落日神鴉集廟門滿目淒涼秋色裏向南枝上有霜痕出城里許高阜上有岳武穆先塋碑又行十里路旁有碑二一大書文王演易處一大書文王姜里城旁有文王廟水經注姜城故姜里也一名牖城又五里爲姜河鋪又行十里入安陽縣界路左有鄧禹杖策追光武處木坊又五里爲魏家營曹操屯兵處又行二十里宿彰德府南關關外有韓魏公故里碑按彰德古河宣甲居於此爲鄴地晉置魏郡曹操受封於此稱爲鄴都後趙石虎前燕慕容儁並據之後魏曰相州

初三日辰出彰德府城北門有西史二公舊治碑爲安陽令孫大蘇題建過安陽河一名洹水源自故洹水縣界至林安陽二縣屢伏屢見東入衛河上有石橋爲南陽橋行三十里爲豐樂鎮東十五里地有銅雀臺過漳河其源有二一出山西長子縣發鳩山曰濁漳一出樂平縣少山曰清漳自涉縣入境俱東至林縣合流行二十餘里過磁州望見高阜纍纍或曰此曹操疑冢也一統志在滏陽講武城外凡七十二處森然彌望直至磁州而止磁州北關內有鄭府君廟磁州城外斷橋跨水楊柳參差溪流一碧怪樹森立水光山色映帶數十里大有江鄉畫景杜鰲庭太史磁州至杜村口占云長隄橋影挂晴虹一徑彎環野港通薄暮漁人沽酒去釣船閒繫葦花中山光絕少點塵參一抹晴波展鏡函紅蓼已花荷葉老水鄉秋色畫江南野樹歸鴉帶夕昏雲橫深柳不知門沿溪一路煙波綠直送行人到杜村讀此詩如置身其間矣余擬宿磁州因無店仍至杜村日已哺矣是日行八十五里
初四日仍住杜村村爲藺相如故里九龍古道木坊

初五日過車騎關至趙王古城有廉頗墓又行二十里過邯鄲縣有叢臺王郎城在西縣內有明張少保祠出祠行二十里過黃梁仙蹟地有呂仙廟入門有水亭左右池沼皆種荷蓮地極幽靜殿宇深邃前供漢鍾離像柱聯云豁炯炯雙眸自是看穿塵世夢坦便便大腹還應記得漢時書中後供呂祖盧生像一坐一睡壁間刻詩極夥有吾黃麻城項始震

號方中

五古一首余亦題二絕句而去過界河鋪入永年縣界

行二十里宿洛關洛水源出遼州大行山關外有冉子祠三四里許有孔門德行冉子伯牛神道碑西八

里有冉子墓地名瓜尖是也是日行九十里

初六日出關過洛河行十五里入沙河縣界沙深陷足人馬凌兢行如跛驚蹣跚十里過沙河縣城煙火荒涼舊城在縣東一里今廢唐武德四年幽州總管李藝引兵會戰劉黑闥留兵守洛州自將兵扼藝夜宿沙河乃舊城也縣西北七十里有湯山下有湯泉山海經云此湯愈疾爲天下最今不知泉猶在否城內有蘇秦墩張儀使人尾其後資以金帛車馬卽此處又行二十餘里爲張謙故里入邢臺縣界爲古邢國地是日行七十五里宿順德府南關按順德府屬鉅鹿郡項羽改置襄國晉時石勒所據張賓說石勒曰襄國依山憑險形勝之國得而都之霸王之業也自是幽冀多故輒爭襄國北關外爲祖乙故都城內有豫讓橋

初七日行二十餘里入內邱縣界望見一水在東南卽泚水也按山海經注泚水出中邱西穹泉谷內邱卽漢之中邱縣過金隄店爲漢孝子郭巨獲金處有郭巨廟袁簡齋先生有郭巨論是日行六十里宿內邱縣城中

初八日行六十里過柏鄉縣城爲魏裔介故里又行二十里有漢光武斬石人處碑在路西又行五里宿石固店古鄆邑漢光武命有司設壇場於鄆南卽皇帝位畿輔志千秋臺在高邑南漢光武既平王郎行

至鄆諸將固請因築臺於此卽帝位今村北有王莽城縣東北十里春秋時晉之欒邑西北五里有野河爲晉王李存勗立營逼梁軍其將李存璋以步騎敗梁軍處

初九日過槐水按槐水發源贊皇北沙嶺行數里路西有漢車騎都尉馮唐墓碑又十五里爲馮唐故里又十五里爲左軍故里入趙州界過大石橋橋上有樓額題古橋仙蹟四字朝野僉載謂趙州石橋望之如初月出雲信然有二碑敘言此橋爲隋大業二年季春建唐仙人張果老墜驢之蹟今存焉唐文粹中書令張嘉貞司功參軍柳渙散客張或之銘可考也橋之穹窿處舊有一懸石長十餘丈橋已圯壞懸石傾倒有一道人徧募修飾無有施者忽一日霧覆其上聞橋下斧聲聲頃刻霧散好事者視之懸石端整灰蹟尙溼道人亦隱去其碑爲明嘉靖時題記又五里過趙州城西關東街有柏林寺寺壁有吳道子畫水猶存又行二十里宿欒城縣北關城爲欒武子所築故名是日行七十五里

初十日行三十里過荆壁鋪有韓信講兵木坊按韓信斬陳餘泚水上在今井陘趙州贊皇縣界此當是獲勝後屯兵過此與諸將論背水陣於兵法云云時也又行二十五里過漳沱河山海經云大戲之山漳沱之水出焉在今代州繁峙縣東流經定州深澤縣東南卽光武所渡處今俗猶謂之危渡口按漳沱河發源山西流經直隸保定河間正定諸府余所經屬正定縣界尙非光武昔渡處是日行六十餘里宿正定府城內小紅廟三陟店正定秦屬鉅鹿漢爲常山郡置眞定國今改眞爲正南關外爲趙子龍故里時黃安劉崑圃先生秉琳爲正定太守

十一日至府署坐談良久醉歸日猶未盱因與三子定猷遊龍興寺按寺本爲慕容熙龍騰苑後改爲龍藏寺又爲龍興寺有隋開皇三年鄂國公爲國建寺碑額下列碑文書撰姓名皆剝落難辨有大悲閣大悲菩薩卽觀音大士隋自覺禪師所造鑄銅爲之像高七十三尺五代時契丹犯境像毀其鎮人以香泥

補之周顯德時復用其半以鑄錢以香泥易之宋太祖駐蹕城下詢得像始末經營相度適寺後菜園井內出銅又因暴雨有大木自五臺山浮下至龍頰川而止因命官董其事時爲宋端拱三年有張浩書碑字畫完好自宋至我○朝七百餘年日就傾圯恭逢我○○○聖祖仁皇帝西巡過此命出帑金修飾不以煩民始於康熙四十二年落成於康熙四十八年親題碑記有云神光夜燭首出赤山之銅法雨晨流漂下龍頰之水皆紀實也又親題閣額調御丈夫四字至我○○○高宗純皇帝三巡駐蹕載瞻大悲佛像舊有三十六臂因銅重難勝不知何時以木用鐵索貫於梁間○○○宸意不愜因製詩和前韻自注諭旨後因改用兩臂兩足仍還莊嚴寶相清淨法身皆遵○○○聖訓也恭讀○○○高廟御製碑文一首詩三首又恭讀○○○仁宗皇帝御製序文一首龍鳳飛舞雲漢昭回覆以危亭承以風蟲閣數十重後殿高一百四十尺旁有小殿供小玉佛刻鏤精妙爲○○○御府所頒前有大覺六師殿摩尼殿等名皆重臺周礮雕廊畫檻金虬吐檐鐵鳳翼柱金碧照耀遊覽累日莫能盡其妙其規模之廣大形勢之壯麗信區內一偉觀也去寺半里許又有一塔甚高聳惜日暮未及登眺

十二日行四十里宿伏城驛地有先賢閔子騫故里碑王阮亭蜀道驛程記云元侍郎蘇天爵春風亭在驛南蘇村

十三日行二十里爲馬頭鋪卽古蓮花店相傳爲伏羲生處董韞卿尙書師度隴記云新樂西南有義臺卽古野臺趙武靈王出九門爲野臺以望齊中山之境卽此今傳爲伏羲畫卦臺又有洗兒池俗傳伏羲始生浴此蓋地有浴河有義臺訛義爲羲遂多牽附又行十餘里爲小寨鋪舊傳鋪北二十里有孔子落筆處志言縣西三十里有孔子遺筆鄉亦曰筆頭村皆附會得名又行五里過新樂縣城爲春秋時鮮虞舊都漢屬中山國漢成帝時中山孝王爲其母作樓閣於此名西樂里後訛西爲新隋因以名縣又行十

五里宿定州之明月店是日計行七十里

十四日出明月店村北有雞鳴臺一曰關雞臺十道志曰中山郡南有此臺卽燕太子丹聞雞處畿輔志雞鳴臺在定州東南按圖經漢光武舍宿於此因地卑築臺以居雞鳴而去據此一雞鳴臺固有二說邪又十里爲漢安喜城又五里爲慕容舊村又十里過定州城按定州古陶唐氏國周鮮虞地後爲中山國有中山靖王碑後燕慕容垂嘗都此城中央土阜並峙是爲中山或曰去治西南一里纍纍若巨冢者是度隴記云州治卽盧城故址舊爲管仲築杜預謂之管仲城城北十餘里有水色黑淵而不流俗謂黑曰盧不流曰奴今黑龍泉也治東北有韓魏公冢春園城南三里莊有劉夢得陋室故址又十里渡一河俗呼清水河疑卽唐水在定州北澧水發源恆山自東北來會之河上有一村爲陶唐故都地又二十里爲古博陵郡又五里爲漢高祖紀信城又行五里宿清風店

十五日入望都縣界行二十五里見小橋跨澗曲港通流路旁有堯母第一泉碑又五里入望都城金名縣曰慶都東門內有堯母廟廟後爲慶都陵又有望都山世以爲山不連陵名之曰孤山孤都聲相近疑卽所謂祁山也帝王世紀曰堯母慶都所居張晏曰堯山在北堯母慶都山在南登堯山見都山故望都縣以爲名也水經注堯山俗謂之都香山在唐東北望都界按望志伊祁山堯母肩胛葬於慶都曰慶都陵慶都西北有伊祁山祁水出焉越蒲陰經慶都之北鄙慶都西南有唐縣堯封於此以足徵金之慶都堯之所生唐則堯之始封邑也今望都城北關外有帝堯廟建於元至正三年重修於乾隆五十年余入廟謁帝像山龍藻火欽明巍煥梁間有○○○高宗純皇帝御製詩壁間有望都令沈寅碑記廟前有元至正碑明萬曆碑康熙時碑是廟年久圯壞○○○高宗西巡過此命出內帑修葺近時復加丹堊故棖桷一新得仲就日瞻雲之敬焉又十里爲光武故城入完縣卽古之曲道城見一水凝滯之支流漢地里

志霽水於曲逆城北曲而西流故曰曲逆章帝醜其名改曰蒲陰又十餘里入滿城縣界漢高祖封張敖北平侯爲北平縣尋以蒼子孫蕃衍徧居城中乃更縣名曰滿城是日行六十里宿方順橋度隴記曰方順橋古曲逆地橋在鎮中霽水所經後人改名方順蓋曲逆之反在今縣治南稍西五十里按光武追銅馬五幡於北平破之於順水卽方順橋也

十六日清明行十五里過涇陽驛又五里張燕公讀書處過大汲店小汲店入清苑縣界是日行六十里宿保定府西關保定禹貢冀州地秦爲上谷鉅鹿二郡顧祖禹方輿紀要云府居三關之中形勢適均誠三輔之長城兩邊之內險度隴記云保定府博大爽塏三關重地紫荆居庸倒馬爲內三關山西之甯武偏頭鴈門爲外三關皆燕都之衛干阮亭秦蜀後記云府治清苑縣一畝雞距二泉夾郡城合流南入滹水度隴記曰西南關吳家灣清苑河卽一畝泉也而方輿紀要則云清苑河府西二里一畝泉府西三十里一名尙泉未知孰是

十七日行十五里過徐河橋河發源易州五迴嶺宋太平興國元年裴濟擊契丹於徐河四年錢守俊與張勛遇敵戰於徐河斬首千級皆此地又五里西漕店又五里漕河河自西北朔甯縣曹河澤發源由滿城南韓營流入安肅楊村界南岸慈航寺東有給孤獨園路旁有方敏恪公觀承周司空元理慈航寺留養局碑記蓋養局方敏恪創行之周司空繼之寺有二公祠相傳敏恪微時過曹河值大雪飢臥寺門外寺僧夢雪中臥一虎開門見公遂相延接留寓寺中及公總督直隸遂崇飾此寺感術者之言於境內創行留養局以救饑獨流民慈航寺其一也寺前古木參雲石橋迴檻方丈內香鑪茗盃琴牀畫凳悉皆雅潔案上梵夾駢羅一僧出而揖客導遊徧寺曲徑通幽竹林花木魚鳥親人禪房懸一聯云兩世因緣參佛地一心澄鏡照曹溪方制軍受囑述職入都過此拜其世父敏恪公祠留題寺中而作也又五里荆塘